

四庫全書

集部

欽定四庫全書

集部

皇清文頴卷二十九

詳校官檢討臣朱依炁

主事銜臣徐以坤覆勘

覆校官中書臣田尹衡

校對官中書臣金光悌

謄錄貢生臣金拱闇

欽定四庫全書

皇清文頴卷二十九

碑

睢州節烈祠碑

汪琬

睢州節烈祠在城西隅距州治可一里故建以祠

誥贈恭人趙氏恭人蓋

誥封中憲大夫陝西按察司副使湯公諱祖契之配前

江西分守嶺北道布政使司右參政今翰林院侍講斌

之母也琬謹按前明崇禎中流賊李自成寇開封歸德間所向殘破騷及睢恭人聞之謂其家人曰州為兵衝未易保也脫變起則吾夫上有老母不可死吾子又宗祧所係不可死吾直以一身行吾志耳徐語中憲公命斌讀書於北郭外斌依依不忍去輒叱遣之已而睢城果陷又急語中憲公俾負其姑許夫人以逃而身自坐堂皇召家人謂之曰吾家世名門萬不可受辱闔戶經於梁家人驚解之復投於井又出之恭人怒誓曰賊

至不死非節也死不以時非義也賊尋入環刃相向恭人厲聲大罵不絕口遂遇害崇禎十五年三月某日也年三十有七斌方踰城號哭以蹟恭人而恭人則已拒賊死矣知之者無不太息泣下越七年為

皇清順治五年河南提學僉事李公震成始檄知州房君星曄建祠故居之東每歲率官屬往祀又十二年巡按御史李公粹然始具其事上於

朝奉

旨旌恭人之門如故事州人老穉聞有是

命咸譴呼奔走拜迎祠下且酌奠以告於是知州戴君
斌顧瞻徘徊歎其地之湫隘弗稱非所以侈

上恩厲末俗也乃率州之大夫士與湯之宗老及其子
姓議改築而遷焉卽今祠是也鳩衆庀材自門而坊達
於前堂後阿其旁眡牲有所庖湑有房徹藏祭器有庫
俱次第訖工顏其南榮曰節烈棟宇靚深丹堊增麗畚
埽清潔奉享以時用以揭虔妥靈昭示遠邇俾無遺

國家烏頭綽楔褒揚大節之意甚盛典也顧麗牲之碑
既伐既具久猶無辭以刻會斌與琬偕奉薦舉之詔來
集京師斌遂以屬琬琬自分文學駑下固讓不獲命始
覲顏執筆為之辭竊惟春秋歷十有二公孔子書內女
之賢而以烈著者宋伯姬一人而已今歸德故宋大火
之墟而睢其西境也恭人生於伯姬守禮之鄉相距二
千餘載卒能躬蹈白刃忼慨不詘顧視屠毒甘之如飴
以恭人之死於兵例諸伯姬之死於火庶幾其易地同

符者揆以春秋之指其當得書也審矣至於恭人其他懿行莫不可紀具詳吳祭酒偉業孫徵君奇逢所撰傳中概不備書特書祠之本末俾刻焉以勸來者系之詩曰

上帝降衷乃叙彝倫婦也事夫臣也事君臣忠婦節二者則均弗撓弗污恒性斯敦世衰道降如川之潰或懼於威或誅於利俛首曲鄒孰勸於義佩紱者然巾幘奚議恭人之賢是實女師克孝克勤克淑爾儀爾命不猶

遘時艱危舍生赴死克全厥歸嗚呼恭人永矢貞正平
居從容素志先定嗚呼恭人睥睨兇鋒戟手奮詬有氣
如虹寧碎我首寧堪我胷肯玷髮膚而犬豕從嗚呼恭
人遺爽不沒凡厥忌辰陰氛四塞颺馳雨擊陟降怵惚
霧車雲旗莫之可測煌煌高閼天子表之潭潭新宮守
侯考之春禴秋嘗恭人下之于豆于登于薦蘋蘩恭人
飲食福爾子孫宜惟子孫徧惠州人

擬勒銘拖諾山恭紀

聖武神功之碑

張玉書

維天丕覆春生秋肅化彌宇宙惟

聖法天仁有義正道洽垓埏

聖恩浩穰重譯畢至莫敢不來享

聖威如霆四征弗諱莫敢不來庭
蠢爾狡寇僻處窮荒
肆擾邊堠悖天虐氓茂誓拒命
游啟逆萌相彼狂啞恩
不可懷德不可結度彼兇謀如虺
斯螫如苗有蠹

天子曰吁蔓草易滋予其亟圖之師難遙制克敵在機
予其親泣之廼籌軍幄諸路並馳或犄或角廼刻師期
中夏畢會勿疾勿遲廼命轉粟載輸載輓勿憚跋涉
命度泉載浚載鑿固避深堅廼治道塗廼設郵驛我軍
用蘇廼置斥候廼謹邏偵敵情斯售

廟謀備矣明誓六師所向迅驚昭告神祇以禡以輶百
靈咸熙爰建旌旂爰蒐卒乘爰飭戈矛前矛戾止中權
銳止後勁厲止虎旅嘽嘽捷若風雨奮若羽翰軍聲烈

烈剪彼鶚林轢彼鼠穴彼昏實愚謂茲沙磧泉涸草枯
王師不撓有相自天馬騰士飽彼昏實蠢既覩王師駭
自天降卷甲而逋遄奔如鶩棄及乳雛西師洸洸遠涉
瀚海注矢天狼賊兵猝避軍鋒大鑿移時立敗俘廼甲
兵籍廼軍械飼廼牽牲幕庭稗矣賊衆攜矣斯授首期
矣旌門獻捷衆聲若雷

宸謨悉協

天子曰俞自茲邊鄙庶無後虞絕塞無垠縱橫掃蕩不

逾七旬邊沙如壘建威銷萌何翅萬里維山迤逦式名
拖諾

黃鉞是麾于茲停蹕于茲振旅允宜紀實我

皇決勝衆議弗淆羣疑弗聽我

皇握樞效順則撫搆逆則誅威以仁行謀以智神功以
斷成肆殊方重譯歷世千億永覩茲石

擬勒銘狼居胥山恭紀

聖武神功之碑

張玉書

聖人在宥函宇帡幪丕洽文德載揚武功文以撫衆武
以鋤兇稂莠既刈良苗斯豐緬彼朔漠狡寇跋扈昔修
貢職世窟厥土自絕於天邊圍用侮聚若鳥獸散若風
雨我

皇覆露德音頻仍悔罪內嚮庶汝用矜厥心不懲神人
怨憎

皇赫斯怒捷伐是膺乃總貔貅

躬親韎韐直馳中堅預阨歸路困獸猶鬪窮猿卒仆賊
勢大摧罔敢枝梧粵自北遁卷甲西奔收合餘燼或伏
或蹲食盡而饑逋竄孔繁

皇曰急擊焚枿勑根

鑾鈴冬狩減御約齋豐州之北大河之西降人踵至羣
醜內攜執迷者滅炳若燭犀爰及早春三臨朔塞羌來
歸俘鴟敵就逮爰飭我旅爰敵我愾軍鋒兩道鐵騎千

隊烈烈神武先聲載塗洊逼靈朔載張威弧賊悔噬臍
賊懼切膚一夕自斃訖就天誅惟

皇濯征時經一載出入萬里洪河瀚海捷書馳聞軍心
樂愷瞻仰

睿謨績婉因壘

睿謨維何早設三覆絃網恢張狡智莫售如鳥在笥如
狄在囿以縱以擒神機盪寇方師始出整旆建旗

九重經畫儲峙百需屢無輟市田無算車過師十萬如行康

衢令軍旋歸飽糗秣藁片甲不頓斥堠環保日晶月瑩
氛翳迅掃蠻戎羌氏悉遵王道

聖心仁愛銳意止戈一視中外立拯痼疴各謹爾職各
寧爾家

皇則錫福自邇訖遐繫我藩臣四十九部竝塞族居畫
疆守宇既剪蜂蟥既殛獬獬尚協乃心載瞻我武嶽嶽
狼胥史冊著聞

神威遐暢親駐六軍惟天時佑惟神助欣磨崖深刻用

昭大勲大勲告成

皇益布德地博天崇生民允殖

聖神文武惟

帝時克於萬斯年祚永無極

光祿大夫總督江南江西文武事務兼理糧餉操

江兵部尚書兼都察院右副都御史贈太子太

保謚清端于公祠堂碑

韓 茨

我

國家監古王官之伯出大臣以總一方兩江地襟帶東

南賦煩積重又聞苦兵革休息長養董統齊壹以紓

顧憂恒難慎其人康熙二十年我永寧于公以畿內巡

撫

特簡來節制其地公素以清望著威名至是操益厲襍
被單車布衣疏食吏懾望風民悅載路視事二年條教
大行絕苞苴止僭濫清獄訟肅軍伍除稂莠安良有
不便之者流言布聞不恤也以暇興庠序習禮讓數闢
書院講學其間俗方彬彬焉天不慙遺奪我壽者在厥
服

天子救功閔勞葬贈有加親製祭文書以賜其家維時
兩江數千里百萬生齒保抱攜持燭香望哭哀音相屬

不絕而我蘓之民彫剝之餘視他郡為劇幸社席于公
尤不勝嬰兒中路之悲摧號殞慕久益不忘則相率為
祠以祀公子來丕作地翦其隙材庀其度工一其力勞
歌不興歡成若靈旗纛麾幢飛揚盱眙父老子弟雜肴
進蔬惟序維時而屬其鄉人韓蒺文其麗牲之石蒺旅
進拜謁而言曰公之勞於外也久公之福於民甚溥嘗
試言其大者從兩蒼頭招了遺之民俾有政有居公之
為政於羅城也民罹賊慘脫之水火大工大役身服其

勞而民不擾公之為政於合州也削平巨盜以固巖疆
公之為政於黃也會計數百萬之餉不乏軍興而身不
名一錢公之為政於閩也申保甲以清盜藪鋤彊禦以
甦民困尤推薦屬吏今左都御史于公府尹衛公兩公
起而活民又無算公之為政於畿輔八州也繼自今孰
不俎豆公我邦之民即時思召伯之棠嘗墮峴山之淚
顧安得而私公焉雖然方公在時中外罔有大小遠邇
屋漏衾影莫不有公或相恐曰得毋公來乎或又曰將

毋不來所不到之地猶若或臨之也況其在宇下者匹夫匹婦又公平日之所惻然今者黃童白叟雜然而祈賽於一堂固公之家人父子爾庶或享之亦神之志也夫災既退而書之石復詩以繫之以當迎享送神之曲容歌而薦之其辭曰

帝勤南服寄公安危公獻其身有勞有施維卒不渝孰磷與緇

王言如綉表以素絲滔滔江流曷云其逝肅肅柳荒參

差哀嗚不言不辭靈往勿亟勿捐我袂或遺我袂吳儂
望思廟河之許弗敢弘殺取庇風雨匪綴匪堅裁去烏
鼠安公平生蕭然環堵嘉薦普淖粢醴在堂胼胝我餘
不遐降嘗有苦有薇以芼以湘侑公平生唐園滿腸我
杜于斯我臘于斯

天子有命公實來尸曷間存歿神無不之千秋茲土食
無我違

巡撫慕公免役碑

韓 炎

太子少師兵部尚書副都御史慕公撫江南承民困久
拊循休息扶傷救敝張弛緩急大綱萬目咸劑其宜蓋
上體

聖天子愛養元元之盛心而行之以誠濟之以權其憂
民之憂若急焚溺其形民之力若護元氣凡督撫重臣
所不敢請者公必力言之或言之而格不行者公常獨
奉

中旨報可以行於中外皆蒙其便者比比也始公當官
即有濟天下之志既受重任念當世民之積困在賦與
役而江南賦甲天下公為之請減請蠲請緩既更罹水
旱力請賑往往不待

報而以便宜發粟所全活無慮數百萬萬役法久壞自
公均役以便民事簡費輕減往時十分之五會滇黔閩
廣相繼煽亂

王師四出舳艫蔽大江而下所需夫役牽挽動以千萬

計公所以調護之者萬方所全活又無算而調發煩數民猶不堪其苦康熙十八年秋公乃疏於

朝力陳其狀大畧言自軍興以來緯夫率僱募民間給銀夫一錢民間兵來爭逃匿不應募不得已計里均派先期拘集封閉公所守候日久官錢不敷里中賠貼又不敷以致饑寒踣頓相屬此兵未臨而備夫之苦及兵既到計船給夫悍兵及刁惡船戶橫索財物搜剝衣糧沿途鞭撻多致死傷莫可究詰此兵既臨而當夫之苦

臣今酌議緊急軍機呼吸難緩者仍給緯夫外其凱旋
回京及各省調遣歸標官兵每船應夫若干以其直給
船戶令僱足水手則夫可罷凡民間貨載無夫亦行兵
船無夫不行坐水手不足船戶得夫之直於僱募易且
資日用有餘自樂從事此法若行直省一例循照無悞
師行以恤民力甦積困便

上命廷臣集議皆是公言行直省著為令自是之後
王師取道荆湘江廣閩浙以至山東西河南所過相望不

絕而民間或不知或相扶攜以觀無何問者而江南當
孔道師尤旁午又屬屢侵民之丁男老弱須臾未死亡
之身得無調發之煩以復從事南畝或就旦夕之饘粥
以生以養無驚恐者孰非公此舉之賜乎蓋公之規畫
不於其一時必其可久不獨惠一方必及天下如是也
塗於舞巷於歌皆曰公活我四方遠者傳誦公之疏皆
泣下曰公活我災無奚斯吉甫之才職在史氏側聞民
之歡聲可懷也爰寫其情而韻之其辭曰

五材迭用金行為兵蠹茲不諛桓桓徂征

宵旰拊髀怒以安民一夫不獲軫我

皇仁黃龍青雀在河之隈疾若使馬如霆如雷百丈邪
許厥聲喧唳警警役夫亦孔之哀走藏無所吏呼何怒
公家有程死生前路饑寒戰瘕彊行旋仆執朴以扶黔
哲誰訴三年鬼方鑿鼓怨咨哀我憚人命委鞭笞舟人
之子職勞不來敢告司僕遑恤我私藹藹我公敷求民
瘼觸目隱心妙用盤錯昔也鳴絃曾試其畧挹彼注茲

譬若洄酌舟流靡届下上自如估客萬斛寧有後期篙
師好手罷民何為官益爾緡爾自度之上章得請征夫
歸止率土之濱式狂以喜夫完其婦父拊其子流亡以
還尫羸以起昔我往矣誰藝誰樹今我來思為農為圃
昔我往矣市廛其空今我來思舉袂成風公在東南公
澤侯甸嘉穀膏雨崇朝而遠公仁自今公及世世斟酌
泉源其流不匱謀猷爾嘉於惟顯良公謝不居

聖心無疆

一德會合動罔不臧曷不和羹平我萬方

鄒縣重修亞聖孟子廟碑

朱彝尊

堯舜禹湯文武周公之道傳之孔子孔子傳之孟子昌黎韓子之言天下之公言也當其時孔子沒而微言絕七十子沒而大義乖曾子之徒有吳起子夏之徒流為莊周周再傳而為孫卿蓋有以闢問於墨翟者而孟子受業子思之門人舍冉閔游夏願學孔子其言醇乎醇其色粹然見於面盎於背施於四體其氣塞乎天地之間而毋餒於滕世子道以性善於齊王先攻其邪心於

梁去利而先仁義春秋弟子不能贊而孟子發其微性
與天道弟子不得聞而孟子暢其旨此之謂名世此之
謂大丈夫此之謂豪傑之士自韓子功不在禹下一言
百世之論定矣乃世儒以其矯枉過直有不知而續其
書者或刺之或非之或刪之或詆之或疑之至或比於
忍人辯士儀秦之流幾於侮聖人之言也已明之太祖
頒其書於學官當吳元年即諭許存仁曰孟子專言仁
義使當時有賢君用其言天下豈不定於一乎又敕文

學之士曰朕聞孔孟於世利濟之心慮恐不及諭桂彥良曰孔孟一聖一賢自漢唐以來稱之諭趙晉曰孔孟之道卿幼學壯履大哉王言必孔孟並舉其命劉三吾節文者為發題試士恐啓諸生訕上之端爾乃無稽之言謂帝欲廢孟子錢唐進諫以腹受箭野史近誣不足信鄒縣為亞聖故里廟在縣南門外由來已久其初棗崇之典未及宋元豐六年從吏部尚書曾孝寬之請詔追封鄒國公政和五年太常議以弟子十八人配其後

季孫子叔罷祀配者堂上一人廡下一十五人彝尊三
謁廟見棟宇摧頽久圯不治心焉負疚若疢疾之入於
懷也歲在乙丑丹徒張公以右副都御史巡撫山東始
庀材以葺廟明年工畢遺彝尊書大旨謂子之論文六
籍之外七篇是宗廟成宜有碑曷操奇觚以志歲月彝
尊不敢讓謹以聞於師者具書於石兼取外書遺意括
為歌詩其辭曰

大人藐之白羽之白輕兮楊墨距之白玉之白貞兮萬

鍾去之白雪之白清兮源泉混混盈科後進泰山巖巖
雲天是參昔先王肇祀三遷之里春秋俎豆鄒嶧之趾
遺像在屋坐以千年林有灌木井冽寒泉懿矣張公撫
茲東土維正學是崇靡廢勿舉生民以來盛於尼父聖
克亞之秩祀斯所

重修泰安州東嶽廟碑

朱彝尊

禮山川之祀以望其既祭也則以牲玉廋而縣之於林
沉於水未有升高祀者其後易壇壝為廟而五嶽皆於
山下恒山祀上曲陽遠在數百里外猶不失古望祀之
義焉東嶽廟在泰安州治西北隅寔嶽之南麓前三門
門三塗樓峙其前神之居在五重端冕秉圭一如帝者
之儀議者謂五嶽秩視三公然周禮有兆五帝之文宰
五行配五色後蓋分祀五方而青帝得祀於岱章服之

盛非僭也書歲二月東巡狩至於岱宗爾雅釋山曰河東岱應劭曰岱始也宗長也萬物之始陰陽交代故謂五嶽之長相傳神掌死生之籍故曰齊度游四方各登泰山籙蓋自九皇六十四民以來秩祠不改彼嵩華恒霍特廟祀一方而已神則祀宇徧天下生民之奔走威福者疑神崇標峻極是處由是山椒嶽頂各飾神祠金碧焜煌於松栝之表至州城之廟載諸祀典祈報者或未之過焉惟朝廷有大典禮特命使臣祠告外則州之

有司春秋致祭一灑掃而已廟以是久不治嗚呼抑知百神受

天子職必祠官祀典所載乃其所以憑依也與

皇帝踐位之六年躬攬大政告於海內名山大川爰命秘書院學士宛平劉公修岱宗之祀使旋尋奉

命撫東土既至檄知州事林君修治於是三司以下靡不率錢為助采大木於江淮由運河輦於廟明年竣事城之雉堞殿之垣墉戶之棖樞土者為臺木者為榭鼓

鐘之樓齊福之所宋廂案檠瓊甌罍罍莫不畢治穹碑
斷碣踣者復立鬼物青紅夾門左右州之男女遠方之
人咸來覽觀小大稽首爰礪貞石以書歲月公授簡彝
尊曰斯文也非子不可彝尊伏念岱宗為先王省方之
地觀民設教於是乎在有孚顒若惟神是依治神人以
和上下建神示以保邦國觀化之理一也萬物出乎震
妙萬物者莫如神天地之盛德仁氣備焉神之靈爽既
妥百物以諧四時以序協乎先王望祀之義將遐邇之

祈報者不於彼而於此焉庶無戾於古矣乃作詩曰
萬彙之生孰秉其權陰陽相代有化必遷巖巖喬嶽善
氣所宣降婁之躔天柱左海羣山是宗莫之與等惟神
司職克配真宰陳書於虞考禮於周魯公三望紀於春
秋百王之祀豈其崇邱嗟世之人不稽祀典鍵此重扃
巒磴是踐神房寢地覆之苔蘚穆穆

天子既親萬幾使告於岱誕及海沂親臣代祀叩神之
扉

帝有恩言爰撫青社小東大東綏此勞瘁有淑者旂有
肇者馬乃巡於野乃舍於郊乃諏司牧爰暨庶寮浮木
於江斲石於磬公來奉符五宿山麓新門有伉四阿重
屋亦有寢宮陳其牲玉有蒼者璧帝睟其容百靈來會
爾侯爾公奕奕者廟神罔時恫鬱鬱唐槐丸丸漢柏樹
以豐碑昭神之德使山如礪報祀不忒

好舛廟碑

朱彝尊

天子之大蜡八其祭坊與水庸之辭曰昆蟲毋作詩曰
去其螟螣及其蠹賊無害我田穉故以方以社報祀於
田祖祈年於天宗先王之勤農事可謂備矣予考之周
官凡天鳥蟄獸狸蟲水神蠹物為民厲者莫不掌之以
官牡鞠牡樺象齒蜃炭方書靈鼓其攻縈之術必詳顧
昆蟲害稼者不及焉何與豈其有所未詳者與非然也
蓋鳥獸庶蠱之妖世不恒見則攻縈之術罕傳不有司

之無以祛民之惑若昆蟲害稼農人咸知所以毆之農之所不能毆者官亦不能去也故特責其事於田畯致其祈於田祖為之秉畀炎火而害可去先王治人事神之道蓋無不宜也蚡蚡廟去汾州府治一十五里歲丙午八月予謁神之宇觀廊廡所樹碑率鄙俚不文里有隱君子胡庭者請予曰子盍為文紀之予惟神之名號未顯於前代而主民穡事近乎古之田祖至蚡蚡者害稼之物陸機以為螟之屬也神以是名猶翼氏蠋氏之

命其官爾矣嗚呼自浮屠道士之說興先王祀典所載
神示物魑之號往往潛為所變易世之祈報者久而不
復察焉往予兒童時江南飛蝗蔽野見所穰神皆出二
氏無稽之說蝗亦卒不去既心知其非嘗有慨乎儒者
之不能師古輒為二氏所惑也若神之名號則猶循古
之遺而土人之載牲擊鼓致賽於是者去祈年方社之
祀不遠微庭之言固將以是告世之君子其或不幸而
罹凶旱螽蟥之災則當以此邦之人事神為法以無戾

先王報祀之義而不為浮屠道士之說所惑庶乎其可
已系之以詩曰

彼汾之陽其原膺膺曰好曰蚡痒於而稼神司厥職名
用不懲大田既臧蠲之豆登農夫之祈維黍及稌農夫
之報自陬越涂我從籥章載歌幽雅辨神之號告諸方

夏

皇清文穎卷二十九

欽定四庫全書

皇清文頴卷三十

贊

易贊

李光地

易之為書源流已遠至於近今為說家滿衆星繁繫必
辨緯曜羣言紛錯孰執其要我論聖統則折諸賢胡心
是師曰余單傳折中賢者又以聖斷聖雖邈矣微辭有
爛聖欲加年愚者須幾徒有日孳至斃乃已緬繹聖訓

觀彖可知姬公有言文王我師故知稱名始自文考憂
患有興繫辭已曉六爻之作於是取材位之凶吉時哉
時哉夫子之傳莫先於彖彖意既得爻斯過半其次釋
爻片言摘抉夢寐周公如合符節大象之立推類廣引
或離卦意皆卦之緼載稽三傳祖文宗周又通其象使
理周流復總全經通論其要易簡之精乾坤之奧河洛
苞符著卦圓方繫辭義例學易典常廣大精微著明深
切如網在綱若車有轍厥後三篇出自河內圖隱象湮

千載明昧首定其類次變其通序之雜之觸長無窮

欽定四庫全書

卷三十

朱子像贊

李光地

堯舜之道二典僅垂孔氏六經至秦而灰漢唐之間道
墜文喪董韓王楊晨星相望宋之中葉其學大醇及乎
夫子程周彌尊閑聖之嚴憂世之厚顏瀾稽天獨執其
咎刊去枝華務見本根菽粟麻絲至味大文肆開堂戶
示我奧宅苟有能者便達天德於戲五百之運歷古而
同建武貞觀一時之功天為萬代金口木舌夫子之生
於湯有烈方明之初一術專師風流篤茂夫子是資詭

說汨之於聖則畔夫子道微貞元亦散孰陟嵩華越彼
平岡孰能涉海而棄舟航夫子之道與時屯泰婺女之
墟光耿長在凡我后裔瞻仰來茲古人有言心嚮往之

御書翰林院扁額贊

韓 炎

大書特書

天文發蒙序如父繫經義昭融警覺提撕振古洪鐘聖
德渾全藝事旁通乾體日強筆健飛龍得心運手元氣
化工

御書都察院扁額贊

韓 炎

唐虞盛世賡歌喜起

宸章垂訓中天齊軌文符二典書兼八體象乾行健臣
鄰仰止欽乃言職之綱之紀晨夕對揚聖顏如咫

御書詹事府扁額贊

韓 炎

聖謨洋洋闡揚洙泗進修德業率由仁義遠邇高卑昭
示所自

揮毫端賜時雨之至榮光萬丈際天蟠地壽世無極赤
文綠字

--	--	--	--	--	--	--	--

十駿贊

志在千里吉行五十曳匹練以飛光竄玉花而屹立匿
匝金支覆氤氲寶香裊閭闔獨步炯如月入歛絕材以
就閑宜休祥兮重襲

右萬吉驪

張照

丹霄紫燕雲龍降精雄姿傑出猛氣橫行騰山跨壑毛
羣震驚於菟之族憑險誰撓林傳風嘯薄隱星晴天駒
怒突振鬣長鳴爪牙縮衄顛隕谿阡威神崇衛

警蹕塵清

右闕虎騶

梁詩正

獅子玉龍為友塵不動風來陡情萬里心

一人坐文殊擁吉雲玉其色獅其力毛且物俱無匹蹄
雪寒耳竹秋成地用與天游可

君意受

君恩日無事冬又春

右獅子玉

張照

龍馬華文朱兩翼軒紀來從太蒙域凌雲超忽奔虹織
踔踔雲雷輸疾亟騰光瑞聖聞疇德即今服阜天閑側
六飛角壯看奇特一團旋風桃花色

右霹靂驤

梁詩正

秀含月窟精降星房桃花汗赭夾鏡瞳方四蹄先鳥一
座如床流水日永行雲風翔般般麟若點點雪裝滅沒
趁趨印首高驤歛彼飛隼庶幾頡頏

右雪點雕

張照

天子之馬允資德驥在越影與超光念乘奔而謹轡比
玉輦之閑安懿九花之上駟騰逸足以無前婉柔心而
馴致惟銜檠之不驚斯以信逍遙之能事

右自在驕

梁詩正

地無驚煙海千里太平百年豐有芑肉駿空老天閑裏
九旒旗下五花美爾獨當御

龍顏喜一嘶羣馬皆竦耳超光趨影去天咫尺底喬雲
紅黃紫

右奔霄驄

張照

感朔思兮風蕭蕭影滅沒兮朱霞飄秋隼橫厲兮盤青
霄大羽獵兮靈之囿徼輕禽兮逐狡獸飛鞚兮驚沙電
掣兮前遮迴靶兮縱鎬不遣霜拳兮破空擊

右赤花鷹

梁詩正

展倜儻以權竒聊逍遙以容與橫秋風而流英撲春雲
而如舞涵淑德於逸才正當年而遇

主殊七十之馮唐比廿四之鄧禹

右英驥子

張照

逸景孫天馬子骨開張姿淑詭凌雲氣輕萬里上天衢
追日軌顧飛龍爭尺咫秣芝田飲蒙汜環九垓歷塊耳
歸

有德勢風靡駮象輿步金甌太一貺匪今始

右籥雲駛

梁詩正

三希堂圖贊

梁詩正

書品稱聖無過逸少家法是貽官奴特妙奕奕東亭韻
流掾筆躡跡雲龍抗行齊匹鐫華永式墨本無多竟完
片璧神物撫呵

幾餘甲乙研精寶笈採掇菁英居然鼎立堂仍溫室顏
曰三希

仙毫記述妙緒雲飛厥義維何物以少貴緬企遐宗轉
含道味與古為徒與天為徒進德游藝於此焉俱心畫

神營旁叅筆陣却笑米家但誇寶晉琅邪羣從風流著
聞披圖靜對未沫遺芬稱制評書右軍傳贊

睿思淵微義超貞觀

三希圖贊

汪由敦

皇上得王羲之獻之及王珣三人真蹟因顏所貯堂曰
三希

御製為記復命臣董邦達合寫為圖臣由敦敬為之贊
曰古人有言文章小技區區翰墨又其餘事乃卓乎立
極於千古窮神入化巧不可階而力不能至義稱書聖
獻之克嗣法護朗朗才復不易至於今二千餘年矣而
一鱗片甲神物呵護者虹光寶氣猶上燭乎

天閭而邀

睿賞於神契蓋一善不遺故慨慕流連既

揮翰以銘堂復圖形於清秘聞之達者於物寓意而不
留意竊獨謂

天縱淵衷本末一貫初無分於道器藝猶如此況等而
上之於牆於羹孰能測

神心之精邃披斯圖也將遠懷自有所寄而非徒寤想
晉人之高致也耶

明史列傳贊

汪由敦

徐達常遇春贊

明太祖奮自滁陽戡定四方雖曰天授蓋二王之力多
焉中山持重有謀功高不伐自古名世之佐無以過之
開平摧鋒陷陣所向必克智勇不在中山下而公忠謙
遜善持其功名允為元勲之冠身依日月剖符錫土若
二王者可謂極盛矣顧中山賞延後裔世叨榮寵而開
平天不假年子孫亦復衰替貴匹勲齊而食報或爽其

故何也太祖嘗語諸將曰為將不妄殺人豈惟國家之利爾子孫實受其福信哉可為為將帥者鑑矣

張寧等贊

御史為朝廷耳目而給事中典章奏得爭是非于廷陞間皆號稱言路天順以後居其職者振風裁而恥緘默自天子大臣左右近習無不指斥極言南北交章連名列署或遭譴謫則大臣抗疏論救以為美談顧其時門戶未開名節自勵未嘗有承意指于政府効搏噬于權

璫如末季所為者故其言有當有不當而其心則公上者愛國次亦愛名然論國事而至于愛名則將惟其名之可取而事之得失有所不顧于匡弼之道或者其未善乎

顧憲成等贊

成弘以上學術醇而士習正其時講學未盛也正嘉之際王守仁聚徒于軍旅之中徐階講學于端揆之日流風所被傾動朝野于是搢紳之士遺佚之老聯講會立

書院相望于遠近而名高速謗氣盛招尤物議橫生黨禍繼作乃至衆射之的咸指東林甘陵之部洛蜀之爭不烈于是矣憲成諸人清節矯修為士林標準雖未嘗激揚標榜列君宗顧俊之目而負物望者引以為重獵時譽者資以梯榮附麗游揚薰蕕猥雜豈講學初心實然哉語曰為善無近名士君子亦可以知所處矣

魏允貞等贊

朋黨之成也始于矜名而成于惡異名盛則附之者衆

附者衆則不必皆賢而胥引之樂其與已同也名高則
毀之者亦衆毀者不必不賢而怒而斥之惡其與已異
也同異之見岐于中而附者毀者爭勝而不已則黨日
衆而為禍熾矣魏允貞王國余懋衡皆以卓犖閎偉之
槩為衆望所歸李三才英邁豪雋傾動士大夫皆負重
名當世黨論之盛數人者實為之魁則好同惡異之心
勝也易曰渙其羣元吉知此者其惟聖人乎

御繪詩經全圖贊

梁詩正

伊古垂訓左圖右書覽觀鑒戒如與游居我

皇稽古道存目擊無逸豳風高張殿壁

娛情翰墨清燕餘閒萬象天秀隨元氣還詩三百篇繪
事流美惟馬和之超宋畫史風雅攸寄尚有典型匪刪
匪逸不見全經爰整曩規羣工待

詔仿舊補遺擬追筆妙能品備矣未進於神

仙毫點染飛動疑真乃睠左方

御書章句遠邁思陵諸體畢具南陔以降東哲補亡周情孔思

更撰篇章

幾暇從容程功勿亟七載集成菰林動色生氣遠出銘
治化爐遺文總錄合璧聯珠紉縵烟雲昭回星漢萬丈
光華

天章縈貫

神心遠邁大義載宣匪曰游藝進德在焉五際六情條

網可述理趣環深蘊涵微密寫氣呈貌屬采附聲美刺
審象心開目明受詩卒業求端要止大旨所存聞子朱
子斯圖重炳可興可觀開卷自得無勞仰鑽由缺得完
因文見道舊蹟流傳儼然師保小臣稽首大哉

王言妙闡經義德成教尊形四方風繫

一人本但凜陳詩何煩補袞丹青法戒矇眊誦箴此焉
竝舉不顯亦臨盛德形容千載一遇歌頌無文聊充傳
註

歷代帝王道統圖讚

錢陳羣

伏羲龍馬負圖

道統開天遇聖而授設位成能立極惟后丹圖五五羅
星錯繡蓄秘儲精神物孰寇河流渾渾龍駒昂昂赤文
綠甲背負騰光攷序作卦觀變陰陽文辭未立理蘊已
彰

神農遍嘗百草

帝念蒸民得生而樂教畊耒耜濟病醫藥二儀變化蕃

廡聚薄鞭之以赭有長無落氣均大地數應周天五華
二實性別形遷辛溫克調瘠癘斯捐人心和平壽考永
年

黃帝畫井制畝

繼神農氏黃帝垂裳因民耒耨肇域井疆披山通路省
下土方四道八宅民居以康步測章亥數推隸首師兵
往來原隰左右冕旒相度蓑笠奔走百度漸興經始隴
畝

帝堯欽若授時

惟天為大惟堯則之敬觀懸象授民以時義和既命璣
衡廼窺分至中星是正是推三光揚精五氣順叙民無
憂患燥濕寒暑作息食飲樂恒安處問帝之力何有於
予

帝舜鳳儀麟舞

玉瑞既班琴絃斯撫九成簫韶兩階干羽應律風平諧
音石拊麋鳳為寶來儀率舞羣后至止虞賓在斯揚帝

之華典樂唯夔敷教行賞象刑方施薰風自南恭已無
為

夏禹隨山刊木

禹敷下土四載是乘決濬因勢力靡弗勝爰暨益稷功
能克承祗台之德不伐不矜既道山川乃定貢賦錫圭
告成賜姓表胙百神用饗民宗度數惟日孜孜惜陰成
務

后稷教民稼穡

有邨之興際唐虞夏厥有相道匍匐知稼堯舉農師民
力廼藉嘉種是登陳常贊化險阻既遠民居方夷奏庶
艱食布物土宜粒我億兆以慰其咨肇祀嗣歲以迄於
茲

成湯網解三面

成湯正域克寬克仁若祗惕罪視水懷民出見張網與
物同屯曰為更祝溫然陽春爰釋三方用驅一面高下
左右惟欲所便失禽不誠聖德始見漢南諸侯聞風歸

善

殷高宗夢賚良弼

彼築者誰衣褐帶索芒芒虞野風雲寥廓殷王恭默景
命睠毫賢臣入夢不迂而選用作霖雨爰起冑靡天同
神比孰左右之惟爾納誨庶其輔台克紹乃辟殷祀永
綏

周文王發政施仁

聖人之仁物無不愛急先務者澤必下逮惟此無告萬

狀千態我覆育之勿令終廢至哉西伯化被六州振乏
宣滯敷政優優枯骨瘞矣孔邇求矣維岐之治實啟有
周

周武王訪箕衍疇

天以一清厥朔生水禹順治之九疇是矢推衍增益實
惟箕子書不盡言與圖同旨衡縱十五會于中央錫福
者后建極者皇訪于商耆周祚用昌彝倫攸叙治道大
光

周成王卜年定鼎

武登豳阜實求天保三塗嶽鄙顧瞻周道爰審維伊天
室載考公旦攝政業隆襁褓自周朝步命召經營乃卜
年世兆食獻俘鼎定郊廓和會休明二誥既成越裳是
庭

漢高帝大牢祀聖

孔子至漢二百餘年藏器習禮魯邦世傳高祖過之太
牢祀焉令諸從政肅謁必先維至聖道其大難譽後世

追崇典禮彌著初隆釋奠戎器猶除馬上治之斯言殆庶

光武錫封褒德

漢哀平間密令卓茂舉善而教子民恐後病免歸歟鐘鼓孰右光武即位重賞首購命就太傅錫之侯封克獎循良廼靖烟烽雲臺濟濟車服酬庸茲先論德百爾益恭

唐太宗屏書刺史

漢二千石唐之刺史畀以化權用致上理苟非其人政亦撓骫虞廷考績黜陟臧否太宗君國實重此官屏書姓氏聿求乂安安民要矣知人則難風移俗易史艷貞觀

宋太祖洞開重門

既定荆潭亦克岳朗揆日作宮民應如響營宇有制仰師誅蕩豈居是崇實心克廣爰坐寢殿令開諸門如方寸地寧莫余捫端直通豁反側以安惴惴危微千聖同

源

右歷代帝王道統圖讚其圖為臣母陳書所作竊
臣猥以庸才叨荷

聖主洪恩忝養禁廷仰見

皇上典學功純於古帝哲王懿行嘉言篤嗜遙集深契
精微謹將臣母畫冊計十六幅幅綴以讚另製一
冊進呈

御覽敬申獻曝之忱用志垂韋之義臣錢陳羣恭識

箴

明善箴

熊賜履

善本降衷是為天命體用渾全曰情曰性大本達道心
為之柄動察靜存無將無迎氣拘物蔽表裏交病不鸞
而鶚不麟而獍舉目棘榛動趾獲穽塞義克仁生心害
政何以明之知行兼併去私存公閑邪養正樹德務滋
除惡務屏天理既純人欲亦淨澄若止水湛如明鏡心
君泰然百體從令言為法言行為懿行富有大業日新

月盛一念或差遂分狂聖一事偶違亦關殃慶念哉念
哉道在主敬本體工夫斯其究竟

主敬箴

熊賜履

厥敬維何曰惟主一永矢靡他庶幾弗失戰戰兢兢莊莊慄慄微顯一原初終一律曰欽曰恭功存宥密聖聖相傳惟茲的實周孔之書程朱之筆一言終身敬哉無逸

銘

雜銘

熊賜履

几二章

設之安授乃佚隱而卧忘予恤

彤席慄畫純濫蟠木烏皮勝雕漆

杖二章

扶危定傾維汝之行輔耆翼德維汝之職

藜兮青節兮赤投九節托六尺

鑑三章

鑑汝形明汝性形必端性必正

瑩若水朗如冰宜玉匣畏青蠅

白髮日生丹衷日清鑑乎鑑乎惡知予之幽貞

盤三章

頽面滌塵盥手除垢方寸點污繫誰之咎

澡身對人洗心對天功夫無間維穢之湔

見水思淵懼溺也見凍思寒懼感也

帶二章

橫金則慙鏤玉亦訕縞素委蛇無災無患

垂紳志正書紳道存

履

毋由徑毋臨壑秋露寒春冰薄

枕

高則安欹則憂碎琥珀賦枏榴鴻寶之書不須搜

拂

蠅莫近塵莫沕鄭俠當年只此物千載而下名不屈

屏風

立則端直處必廉方善哉李尤其言孔彰

榻

非其人不設非其人不下

硯

方圓備蒼素分清如池翠若雲是之謂天地之文

墨

習習蘭津融融松液萬歲千秋憑斯一擲如之何弗惜

筆

犀比錐鋒同矢中書君管城子班生投安世珥夢花文
獲麟止毛穎傳盡之矣

紙

白簡見青蒲變文愈衍道益銜是以君子慎所撰

文房雜銘十二首

陳元龍

中書勞勩載寢之牀我方脫脫爾倦朱黃俾爾小休以
養毫銚動極思靜道在善藏

右筆牀

墨海既瀦研山尤峻紋如波皺質同玉潤在昔米顛署
之寶晉墨雲滃然橫開筆陣

右研山

玉蜍一勺涓滴幾許散作墨花天孫機杼古貌是式虛

中是注膚寸而合為天下雨

右水丞

管城所都譬猶武庫麟角鼠鬚居然成聚或剛或柔亦細亦鉅隨材器使綽有餘裕

右筆筒

楮生有文宜主以靜式金式玉抑浮戒橫如砥之平如珽之正藉爾端方以為鎮定

右鎮紙

光分太乙短檠毋棄玉漏初長蘭膏方膩霏霏煜煜吐
燄結穗三餘所資不遑宵寐

右書燈

雪花打窓紫玉冰結染翰濡毫倩誰呵筆微溫始泮春
盎流溢生意融和愛如冬日

右研爐

懸腕斯貴枕腕斯易指法既運且休吾臂即墨膺封管
城晉位乃召此君作掌書記

右臂閣

墨去其積言去其陳滌除舊染鋒穎彌新質瑩神完體
潔用醇揮毫落紙清無點塵

右筆洗

比之律度為天下式在易維坤六二協德烏絲紫闌縱
橫若一受材不欹好是正直

右界尺

書貴瘦硬代筆以鐵快劍長戟繆篆糾結邇駝壓紐秦

殘漢缺清閼蕭閒古香郁烈

右圖章

盛以水玉和以瓊液流耀含英內映外觀爰佐書史如
圭如璧千秋丹篆榮爾勲績

右印池

寶座銘

徐本

大寶曰位底定四方聖作物覩恭已垂裳黃屋丹宸世
有典則膺籙受圖懋昭令德南面而聽居高臨卑聲律
身度惟敬之為曰禮制心曰義制事記動記言史左右
侍雕龍飾螭追琢其章保定孔固恢廓紘綱承式百官
平章百姓萬邦時雍萬年表正

未央宮瓦硯銘

汪由敦

炎祚開紫宮新陶甃良垂千春宜毫墨壁府珍

銅雀臺瓦硯銘

汪由敦

神雀軒舉藏歌貯舞高臺既傾驚沙宿莽萬瓦鱗鱗遺
此片甲質瑩而澤什襲寶匣豈無良材龍尾鳳咮閱歲
逾千曷若汝壽

又

汪由敦

伊昔之鉅麗瓦也有餘媿而今之遭逢登几席以雍容

陳秘殿松華汎臺安在哉瓦為硯是可鑑

未央宮瓦研銘

梁詩正

元雲蒸蒼壁獲未央瓦鄼侯作軼甘泉貌銅爵刀筆意
早相託到於今伴圖籍播清芬石渠閣

溫室瓦研銘

梁詩正

卯金銷留瓦注鴛鴦影已分蟾蜍氣方吐猶記當年簪
筆人巡簷默數庭前樹

銅雀臺瓦研銘

梁詩正

銅雀雙鳴五穀熟幻化長留硯田宿墨池清泚星光屬

依稀照影漳河曲

又

梁詩正

建安片瓦今依然神工遣結文友緣珍逾蒼玉千秋傳
何似當年燦金碧臺荒空惜參差跡



皇清文穎卷三十